

SIARAN MEDIA KEMENTERIAN KEWANGAN MALAYSIA

KEMASUKAN MALAYSIA DALAM SENARAI PEMANTAUAN NEGARA MANIPULATOR MATA WANG OLEH PERBENDAHARAAN AMERIKA SYARIKAT HANYA MENONJOLKAN KEKUKUHAN DAN DAYA SAING EKONOMI MALAYSIA YANG TINGGI



**Kemasukan Malaysia dalam
senarai pemantauan negara manipulator
mata wang oleh perbendaharaan Amerika Syarikat
hanya menonjolkan kekukuhan dan daya saing
ekonomi Malaysia yang tinggi**

Malaysia merupakan sebuah ekonomi terbuka dengan daya saing yang tinggi. Daya saing tersebut adalah berasaskan kepada kelengkapan infrastruktur yang baik, peningkatan kadar produktiviti, tahap ketelusan yang tinggi, lokasi strategik serta integrasi erat ekonomi tempatan dalam rantai bekalan sedunia.

Walaupun Jabatan Perbendaharaan Amerika Syarikat (Perbendaharaan AS) telah memasukkan Malaysia dalam Senarai Pemantauan Negara Manipulator Mata Wang yang diterbitkan, laporan tersebut tidak menamakan Malaysia sebagai sebuah manipulator mata wang. Sebenarnya, kemasukan Malaysia dalam senarai tersebut bersama dengan negara-negara pedagang utama dunia yang lain seperti Jepun, Jerman, Korea Selatan dan Singapura hanya menonjolkan kekukuhan negara serta peranan yang dimainkan oleh Malaysia dalam ekonomi dunia.

Mana-mana negara yang mempunyai jumlah dagangan melebihi USD40 bilion setahun dengan Amerika Syarikat akan diperiksa oleh Perbendaharaan AS untuk penelitian lanjut. Terdapat 21 negara yang memenuhi syarat tersebut, termasuk Malaysia. Daripada 21 negara tersebut, semua negara yang memenuhi 2 daripada 3 syarat lain akan dimasukkan dalam Senarai Pemantauan Perbendaharaan Amerika Syarikat.

Malaysia dimasukkan dalam Senarai Pemantauan tersebut di atas dua faktor. Pertama, Malaysia mempunyai lebih dagangan dengan Amerika Syarikat melebihi USD20 bilion setahun. Kedua, Malaysia mempunyai lebih akaun semasa yang sihat melebihi 2% berbanding KDNK.

Kedua-dua faktor ini hanya menonjolkan daya saing ekonomi Malaysia dan bukannya bukti berlakunya manipulasi mata wang. Tambahan lagi, kita dapat membuktikan daya saing Malaysia dengan melihat prestasi Malaysia dalam *Indeks Doing Business 2019* oleh Bank Dunia dan laporan *World Competitiveness Ranking 2019* oleh IMD. Dalam laporan Bank Dunia, kedudukan Malaysia telah meningkat 9 anak tangga kepada tempat ke-15 berbanding tempat ke-24 pada tahun sebelumnya. Dalam laporan IMD pula, Malaysia merupakan negara yang ke-22 paling berdaya saing di dunia, mengekalkan kedudukan yang sama seperti tahun lalu.

Pada masa yang sama, peningkatan dalam pendapatan pelancongan sebanyak 16.9% tahun-ke-tahun kepada RM21.4 bilion pada suku tahun pertama 2019 juga merupakan suatu galakan, di mana ketibaan pelancong pula naik 2.7% kepada 6.7 juta orang pada tempoh yang sama. Perkembangan ini membantu mengukuhkan lagi lebih akaun

semasa negara.

Sesebuah negara hanya akan dinamakan sebagai manipulator mata wang jika ia memenuhi ketiga-tiga syarat yang ditetapkan. Seperti yang diperakui dalam laporan Perbendaharaan AS, Malaysia tidak campur tangan dalam pasaran pertukaran mata wang asing dengan tujuan melemahkan nilai ringgit. Oleh itu, Malaysia tidak digelar sebagai manipulator mata wang. Tambahan lagi, Bank Negara Malaysia telah menekankan bahawa Malaysia menerima pakai rejim kadar pertukaran terapung dan sebarang intervensi yang dilakukan adalah bagi mengelakkan daripada berlakunya perubahan kadar pertukaran yang keterlaluan. Ini bermaksud penyenaraian tersebut tidak membawa kesan kepada Malaysia, dan tiada denda atau sekatan ekonomi akan dikenakan terhadap Malaysia.

Malaysia akan terus mengukuhkan daya saingnya secara adil melalui penggunaan teknologi terbaharu, pelaburan infrastruktur, meningkatkan ketelusan, dan memudahkan proses kerajaan dan perniagaan, sambil menggalakkan perdagangan bebas di rantau Asia dan di seluruh dunia.

Sayangi Malaysiaku!

Lim Guan Eng

Menteri Kewangan
Kementerian Kewangan Malaysia
Putrajaya
30 Mei 2019

[Tweet](#)

[Like](#)

Be the first of your friends to like this.